

【经文信息】大正藏第 14 册 No. 0538

佛说呵雕阿那鎗经 1 卷

No. 538

佛说呵雕阿那鎗经

东晋天竺三藏竺昙无兰译

闻如是：

一时，佛在舍卫国祇陀恒，呵雕阿那鎗将五百优婆塞至舍利弗所，作礼已却坐。舍利弗为说经，大欢喜而退。复至佛所，以头面着地，叉手绕佛三匝却坐。

佛问呵雕阿那鎗：「若有何功德，教化五百弟子随从汝？」

呵雕阿那鎗即长跪叉手言：「我常奉行佛所说四事。何等为四？一者、布施于人；二者、说善说；三者、瞻视同学给足有无；四者、同学者财共不计。」

佛言：「善哉！善哉！已过去佛，无有过是四事；未来佛亦无有过是四事；今现在佛，亦无有过是四事。」

佛为呵雕阿那鎗说经已，各大欢喜而退。

呵雕阿那鎗还归入舍，呼诸人客奴婢坐着前，好为说经开解，语生死善恶之道；复上殿呼诸持藏人、诸妓女着前，为说经戒，皆大欢喜；复上后殿，为诸夫人妇女，说经戒已讫，还至正殿，斋戒床上，端坐定意，便得等心。

第一天上四王请诸天皆会坐，共称誉呵雕阿那鎗功德，四天王中尊王下至呵雕阿那鎗舍，面称誉呵雕阿那鎗功德。呵雕阿那鎗时得等心，不答天王。

佛边有一比丘，至呵雕阿那鎔舍，呵雕阿那鎔起迎比丘前坐，比丘说言：「佛坐中常相称誉功德。」呵雕阿那鎔问比丘言：「佛称誉我时，边有白衣无？」

比丘言：「无有白衣，正使有白衣，有何等嫌疑耶？」

呵雕阿那鎔言：「佛语至诚，恐白衣不信者，便当堕泥犁中；正使信佛语者，便复来承事我，布施我，我不喜烦扰于人，以是故问耳。」比丘辞去。

呵雕阿那鎔言：「想朝来未食，且留饮食。」便行澡水，下饭食讫。

比丘还白佛言：「属至呵雕阿那鎔舍，道说言：『佛坐中大相称誉。』呵雕阿那鎔因问我言：『佛称誉我时，边有白衣无？』我言：『无白衣，正使有白衣有何等嫌疑？』呵雕阿那鎔言：『佛称誉我，实至诚不妄，白衣不信佛语者，便当堕泥犁中；正使信者，便复来承事我，我不喜烦扰他人，以是故问耳。』」

佛言：「善哉！善哉！我不常为汝曹说呵雕阿那鎔有七事，今复益一事为八事。何等为八事？一者、不求不欲令人知；二者、信不欲令人知；三者、自羞不欲令人知；四者、自惭不欲令人知；五者、精进不欲令人知；六者、自观不欲令人知；七者、得禅不欲令人知；八者、黠慧不欲令人知。所以不欲令人知者，不欲烦扰于人，故不欲令人知。」

佛说经已，诸比丘皆大欢喜，起前为佛作礼。

佛说呵雕阿那鎔经

【经文信息】大正藏第 14 册 No. 0538 佛说呵雕阿那鎔经

【版本记录】CBETA 电子佛典 Rev. 1.11 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，阎学新大德输入 / 沈介盘大德校对，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
